

Na osnovu člana 12. i 24. Zakona o sudskoj policiji Bosne i Hercegovine ("Službeni glasnik BiH", broj 21/03), ministar pravde Bosne i Hercegovine, donosi

PRAVILNIK

O UNIFORMI I POSEBNIM OZNAKAMA SUDSKE POLICIJE BOSNE I HERCEGOVINE

DIO PRVI - OPĆE ODREDBE

Član 1.

Ovim Pravilnikom uređuje se vrsta uniforme, boja, kroj, zajednički i dopunski dijelovi uniforme (u daljnjem tekstu: uniforma) i posebne oznake sudske policije Bosne i Hercegovine (u daljnjem tekstu: sudska policija).

Član 2.

Uniformu i dopunske dijelove uniforme te službene oznake nose ovlaštena službena lica koja obavljaju poslove u smislu Zakona o sudskoj policiji Bosne i Hercegovine ("Službeni glasnik BiH" broj 21/03).

DIO DRUGI - UNIFORMA SUDSKE POLICIJE

Član 3.

Uniforma sudske policije je zimska, ljetna i specijalna.

Član 4.

(1) Zimska uniforma se sastoji od: vjetrovke sa odgovarajućim ulošcima, kratke jakne, pantalona, beretke, košulja dugih rukava, pulovera, kravate, rukavica, čarapa, potkošulja kratkih rukava, kaiša, te plitkih i poludubokih cipela.

(2) Zimska uniforma za ženu sudskog policajca sastoji se pored dijelova iz stava 1. ovog člana i od suknje, hulahop čarapa i ženskih čizama.

Član 5.

(1) Ljetna uniforma sastoji se od: kratke jakne sa odgovarajućim ulošcima, pantalona, košulja kratkih rukava, čarapa i kišnog mantila.

(2) Ljetna uniforma za ženu sudskog policajca sastoji se pored dijelova iz stava 1. ovog člana i od suknje, hulahop čarapa i ženskih plitkih cipela.

Član 6.

(1) Uniforma za specijalne namjene sastoji se od: jakne za specijalne namjene, pantalona za specijalne namjene, košulja dugih rukava, košulja kratkih rukava, potkošulja, opasača sa futrolama, dubokih cipela (čizama) i kape, te navlake za odijela, policijske torbe i sigurnosnog pancira.

(2) Specijalna oprema podrazumijeva: pištolj, automatsku pušku, policijski šljem, lisice za ruke, gumenu palicu, bateriju, motorolu, sprej za oči, novčanik sa značkom, pločice sa imenom i prezimenom sudskog policajca i oznaku sudske policije.

Član 7.

Boja uniforme i njenih sastavnih i dopunskih dijelova je:

a) tamno plava - vjetrovka, kratka jakna, pantalone, pulover, suknja, beretka, kravata, čarape, hulahop čarape, podloga za oznaku, kišni ogrtač, gumena palica, navlaka za odijela, i putna torba;

b) svijetlo plava - košulje dugih i kratkih rukava;

c) bijela - potkošulje;

d) crna - jakna za specijalne namjene, pantalone za specijalne namjene, košulje dugih i kratkih rukava, potkošulje kratkih rukava, kapa, opasač sa futrolama, kaiš, sve vrste cipela, pištolj, motorola, policijski šljem, gumena palica, baterija i novčanik za službena dokumenta;

e) zlatno žuta - značka, oznaka, identifikacione pločice i lisice za ruke.

Član 8.

Sirovinski sastav uniforme i njenih dopunskih dijelova i opreme:

a) kamgarn - uniforma, suknje, beretka, kapa za specijalne namjene, podloga za oznake;

b) tergal - jakne, pantalone, suknje;

c) pamuk i vuna - potkošulje, čarape, pulover;

d) lan i pamučno sintetičke tkanine - košulje, kratka jakna, pantalone, ulošci i postave uniforme, hulahop čarape, navlaka za odijela, putna torba;

e) vještačka svila - kravate;

f) koža i godur - rukavice, opasač sa futrolama, kaiš, cipele, čizme;

g) vještačko krzno - uložak za kratku jaknu, okovratnici;

h) metal - pištolj, lisice za ruke, značka, identifikaciona ploča, ukrasna dugmad, toke na kaišu;

i) plastika - baterija, sprej za oči.

DIO TREĆI - OBLIK I KROJ UNIFORME I DIJELOVA UNIFORME

Član 9.

Uniforma sudskog policajca muškarca ima slijedeći oblik i kroj:

a) Kratka jakna je postavljena postavom i kopča se patent zatvaračem i u donjem dijelu dugmetom. Naprijed su dva prsna džepa sa patanom i dva donja džepa sa lajsnom ubačenom u prednji stranični šav. Gornji džepovi se prikriveno kopčaju, a iznad lijevog džepa nadšiven je kvadratić od iste tkanine za značku. Na lijevoj strani jakne, taj dio prednjice proštepao je štepom 40 mm, koja ujedno pričvršćava prednjicu s bezecom i patent zatvaračem. Leđa su sječena sa strane i čine leđa iz tri dijela, a ukrasnim štepom i ubačenom faltnom u gornjem dijelu. Faltne su učvršćene na donjem kraju. Jakna se u donjem dijelu završava lajsnom širine 60 mm i kopčanjem na sredini rupicom i dugmetom. Na leđima sa strane nalaze se po tri faltne. Rukav je komotnog kroja koji se završava na dužini sa lajsnom širine 50 mm, a ista se kopča rupicom i dugmetom. Na dužini rukava su dvije faltne okrenute nazad. Na rukavima se nalazi grb Bosne i Hercegovine i oznaka sudske policije. Na ramenu se nalaze naramenice za činove ubačene u šav rukava koje se kopčaju kroz rupicu dugmetom. Kragna je sa štehom. Jakna je postavljena kvalitetnom postavom sa dva džepa. Lijeva strana se zatvara patent zatvaračem, a desna je otvorena. Oba džepa su formirana sa dva paspula uredno proštepana. Jakna je dva puta štepana: po šavu prednjice, satla, patna, lajsna, orukavlje gornjeg dijela, šav rukava, ramena, mandžeta rukava, naramenica, leđni šav. Jakna je jednom štepana: kragna, prednji dio kant, dužina jakne.

b) Pantalone imaju dva dužinska džepa naprijed, sa dva zapeglana paspula širine po 5 mm, iber štepan širinom 2 mm, te na krajevima učvršćeni ringlicom. Na desnoj strani zadnjice nalazi se jedan džep sa patnom, na kojoj se nalaze rupice za kopčanje. Na sredini prednjica u pojasu su ušivene po jedna faltna dubine 20,5 mm duplo okrenuta prema nazad. Prednjice pantalona su sa unutrašnje strane pojačane postavom ispod koljena. Šlic naprijed se kopča sa dugmadima (3 komada), jednim dugmetom na pojasu i jednom kopčom, te proštepan ravno sa učvršćenom ringlicom na kraju. Na gornjem dijelu pantalona se našiva pojas iz dva dijela sa osam gajki. Širina pojasa je 50 mm, a gajke su učvršćene 20 mm ispod pojasa radi širine opasača, na donjem kraju pantalona nogavice se pojačavaju našivenim zaštitnikom.

c) Kapa - beretka je uobičajenog oblika (kroja). Postavljena je uobičajenim materijalom. Donji rub kape je opšiven uskim ajnfasom od crne kože širine 10 mm. U kožni opšiv je uvučena kožna traka za fino podešavanje veličine. Sa strane su postavljene dvije metalne ringlice crne boje. Na kapi se sa prednje strane postavlja propisana oznaka - grb BiH.

d) Košulja dugih rukava je uobičajenog oblika i kroja. Na prednjoj strani se nalaze dva džepa sa iber štepanom lajsnom i patnama koje su ojačane, na lijevoj strani prednjice se našiva lajsna širine 30 mm na kojoj se nalaze rupice za dugmad.

e) Košulja kratkih rukava - poligonka ima naramenice od iste tkanine kao i košulja, i izrađene su tako da se na njih mogu navući naramenice sa oznakama činova. Rukavi se završavaju mandžetnama. Ista ima 2 džepa sa klapnama, a iznad desnog džepa nalazi se našiveni dio (od istog materijala kao i košulja) dužine 50 mm, a širine 20 mm s dvije ringlice. Na rukavima se nalazi grb Bosne i Hercegovine i oznaka sudske policije.

f) Pulover je vuneni na "V" izrez.

g) Kravata je sintetička, uobičajenog oblika (kroja) i dužine, podešena za zakopčavanje gumicom.

h) Čarape i hulahopke su uobičajenog oblika i veličine i ojačane na peti i prstima.

i) Plitke, poluduboke i duboke cipele, su uobičajenog oblika i kroja, crne boje, izrađene od prirodne kože sa lijepljenim gumenim đonom, anilinskom ili platnenom postavom bez ukrasa, na vezivanje i potpeticama do 30 mm.

j) Potkošulje su klasičnog izgleda i kroja sa kratkim rukavima.

k) Policijska torba je srednjih dimenzija sa džepovima sa strane za nošenje u ruci i na ramenu.

l) Navlaka za odijela je klasičnog izgleda i veličine.

m) Kišna jakna je uobičajenog kroja izrađena od nepromočivog materijala, podešena za prikopčavanje uloška vjetrovke, dužine do polovine natkoljenice i ima kapuljaču podešenu za skidanje. Zakopčava se sa četiri dugmeta, a sa lijeve i desne strane prednjice nalaze se kose lajsne - imitacija džepova. Kišna jakna je od okovratnika pa do sredine grudi i preko pleća ojačana istim materijalom od kojeg je izrađena, a na plećima ispod ojačanja, kao i ispod pazuha ušivena je mrežasta traka. Naramenice na kišnoj jakni su od istog materijala i izrađene su tako da se na njih mogu postaviti naramenice sa činovima.

n) Opasač je izrađen od prirodne kože crne boje, standardne dužine, širine 50 mm, debljine 4 mm, ojačan na lijevoj strani do polovine dužine opasača istim materijalom. Na opasaču se nalazi metalna toka sa jednim ili dva trna, kožna futrola za odgovarajući pištolj, futrola za rezervni okvir za municiju, futrola za lisice, futrola za bateriju, futrola za radio stanicu i dvije pokretne gajke sa metalnim halkama za nošenje dodatne opreme.

o) Kaiš pantalona je izrađen od prirodne kože i godure, dužine 1050 - 1200 mm debljine 2,5 mm i širine 30 mm, a zakopčava se kopčom širine 40,5 mm i dužine 70 mm izrađenom od matiranog dekapiranog lima.

Član 10.

Uniforma sudskog policajca žene ima slijedeći oblik i kroj:

a) Kratka jakna sa odgovarajućim ulošcima, kišna jakna sa odgovarajućim ulošcim, pantalone i košulje kratkih rukava istog su izgleda kao i uniforma sudskog policajca muškarca, s tim što je njihov kroj podešen anatomskoj građi žene i što su dugmad prišivena na lijevom pešu;

b) Suknja je uobičajenog oblika i kroja, sa unutarnje strane postavljena svilenom tkaninom odgovarajuće boje, sprijeda ima dvije faltne, a pozadi dva ušitka, na pojasu ima potreban broj gajki za kaiš. Sa lijeve strane zakopčava se sa tri dugmeta ili patent zatvaračem i jednim dugmetom na pojasu;

c) Beretka je istog oblika kao i kod sudskog policajca muškarca;

d) Plitke cipele su istih karakteristika kao i kod pripadnika sudskih policajaca muškaraca, s tim da potpetica može biti do 45 mm;

e) Čizme se izrađuju od prirodne kože, postavljene su i imaju petu do 45 mm. Sare dopiru do polovine listova noge. Kopčaju se rajfešluzom.

e) Hulahop čarape su uobičajenog oblika ojačane na prstima i peti.

Član 11.

Uniforma za specijalne namjene ima sljedeći oblik i kroj:

a) Jakna se kopča metalnim patent zatvaračem, ima naramenice i sintetičku kragu crne boje, a ista se u donjem dijelu završava pletenom sintetičkom lajsnom od istog materijala kao i kragna. Na rukavima se nalazi grb Bosne i Hercegovine i oznaka sudske policije. Jakna je postavljena lakšom, višerstruko štepanom postavom, na kojoj se nalaze ravni džepovi sa plastičnim zatvaračem.

b) Pantalone za specijalnu namjenu imaju dva koso ušivena džepa naprijed, a na lijevoj strani ispod džepa našiven je novi džep dužine 220 mm i širine 200 mm koji sa unutrašnje strane ima čičak za zatvaranje džepa. Na desnoj strani zadnjice nalazi se jedan džep sa patnom. Šlic se naprijed kopča plastičnim zatvaračem. Pojas je širine 50 mm sa 8 gajki, a nogavice imaju zaštitnike i gumene štitnike koji ne daju da se pantalone izvlače iz čizama te čičak za stezanje nogavica.

c) Opasač je izrađen od prirodne kože crne boje, standardne dužine, širine 50 mm, debljine 4 mm, ojačan na lijevoj strani do polovine dužine opasača istim materijalom. Na opasaču se nalazi metalna toka sa jednim ili dva trna, kožna futrola za odgovarajući pištolj, futrola za rezervni okvir za municiju, futrola za lisice, futrola za bateriju, futrola za radio stanicu i dvije pokretne gajke sa metalnim halkama za nošenje dodatne opreme.

d) Kapa je platnena, sastavljena iz šest dijelova, crne boje, džokejskog kroja sa polukružnim štitnikom za sunce širine 70 mm i otvorom na potiljku širine 120 mm, koji je povezan platnenom trakom širine 20 mm i dužine 160 mm, koja je fiksirana na lijevoj strani, te patent metalne kopče postavljene na platnenoj traci ukupne dužine 60 mm i širine 20 mm. Donji rub kape je opšiven uskim ajnfasom. Sa gornje strane kape na svakom od 6 dijelova napravljen je manji kružni otvor za provjetranje. Grb Bosne i Hercegovine se nalazi na sredini prednjeg dijela kape, a postavljen je na visini od 33 mm od ruba štitnika za sunce.

Član 12.

Utvrđeni materijali za izradu uniformi, kao i zajedničkih dopunskih dijelova uniforme moraju ispunjavati slijedeće uvjete u pogledu vrste i sirovinskog sastava osnovnog materijala:

a) Kamgarn

- vuna 55%

- poliester 45%

- težina 480 - 500 gr.

- širina 1400 - 1500 mm

b) Tergal

- vuna 45%

- poliester 55%

- težina 270gr/m

- širina 1400 - 1500 mm

c) Tkanina za košulje

- pamuk 70%

- poliester 30%

- težina 150 - 170gr/m

- širina 1400 - 1500 mm

d) Tkanina za kišni mantil

- vodoodbojni poliester

/ poliamid gumirani /

- češljani pamuk 50%

- poliester 50%

- težina 325 gr/m

e) Čarape

- pamuk 60%

- poliamid 40%

Član 13.

(1) Zimska uniforma nosi se, po pravilu od 16. oktobra do 30 aprila, ljetna od 1. maja do 15. oktobra.

(2) Specijalna uniforma se upotrebljava po potrebi tokom čitave godine.

(3) Kišni mantil nosi se uvijek, kada to vremenske prilike nalažu.

Član 14.

Sudski policajci dužni su nositi onu vrstu uniforme koja odgovara vremenu propisanom u članu 13. ovog Pravilnika.

Član 15.

Ministar pravde Bosne i Hercegovine može izmijeniti vrijeme nošenja uniforme propisane u stavu 1. člana 13. ovog Pravilnika ako to nalažu vremenski uvjeti.

Član 16.

(1) Opasač se nosi prilikom obezbjeđivanja dežurstva i prilikom vršenja drugih operativnih poslova, kada je sudski policajac obavezan da nosi pištolj, gumenu palicu, sredstva za vezivanje - lisice i motorolu.

(2) Na opasaču se sa desne strane nosi pištolj, a na suprotnoj strani gumena palica, motorola i sredstva za vezivanje.

Član 17.

Sudskim policajcima ženama nije dozvoljeno nošenje uniforme kada su u vidnom stanju trudnoće, a u pravilu nakon navršena tri mjeseca trudnoće.

Član 18.

Rokovi trajanja pojedinih dijelova uniforme i opreme su:

Redni broj	NAZIV ARTIKLA	Količina zaduženja kom - par	Rok trajanja u mjesecima
a)	Zimska uniforma - muška	-	-
1.	kapa beretka	1	18
2.	v j e t r o v k a	1	24
3.	jakna kratka	1	24
4.	p a n t a l o n e	1	12
5.	p u l o v e r	1	36
6.	košulja - dugi rukav - plava	2	12
7.	k r a v a t a	2	12
8.	potkošulja kratki rukav -bijela	2	12
9.	r u k a v i c e	1 par	36
10.	č a r a p e	3 para	12
11.	kaiš za pantalone-kožni	1	24
12.	cipele plitke	1 par	12
13.	cipele poluduboke	1 par	24
b)	Zimska uniforma - ženska	-	-
14.	dijelovi kao pod red.broj od 1 - 13		
15.	čarape hulahop	3 para	12
16.	s u k n j a	1	12
17.	cipele poluduboke	1 par	24
18.	cipele plitke	1 par	12
c)	Ljetna uniforma - muška	-	-
19.	košulja - kratki rukav - plava	2	12
20.	p a n t a l o n e	1	12
21.	č a r a p e	3 para	12
22.	ogrtač kišni	1	36
d)	Ljetna uniforma - ženska	-	-
25.	dijelovi kao pod red. broj od 19 - 22		
26.	s u k n j a	1	12
27.	košulja - kratki rukav - plava	2	12
28.	čarape hulahop	3 para	12
e)	Dijelovi specijal. unif. - muški/ženski	-	-

29.	j a k n a	1	24
30.	p a n t a l o n e	1	24
31.	košulja - dugi rukav - crna	2	12
32.	košulja - kratki rukav - crna	2	12
33.	potkošulja kratki rukav -crna	2	12
34.	čizme duboke	1	36
35.	k a p a	1	24
36.	pancir zaštitni	1	neogrananičen rok po potrebi
37.	kaciga policijska - zaštitna	1	neogrananičen rok po potrebi
38.	pištolj HS - 2000	1	neogrananičen rok po potrebi
39.	motorola	1	neogrananičen rok po potrebi
40.	baterija ručna	1	36
41.	palica gumena	1	60
42.	lisice za ruke	1	neogrananičen rok po potrebi
43.	sprej za oči	1	24
44.	opasač - kordura sa osam dodataka	1	36
45.	puška "Heckler - Koh"		neogrananičen rok po potrebi
46.	kaiš - kordura	1	36
47.	torba policijska	1	36
48.	navlaka za odijelo	1	36
49.	novčanik za službene dokumente	1	60
50.	značka sudske policije	2	60
51.	identifikaciona pločica sud.policajca	2	60

Član 19.

Sudski policajci dužni su primljenu uniformu, sastavne i dopunske dijelove uniforme održavati u urednom i ispravnom stanju, dok traje propisano vrijeme njihovog trajanja.

Član 20.

Sudskom policajcu zamijenit će se oštećeni dijelovi uniforme, kao i oštećeni sastavni i dopunski dijelovi uniforme prije isteka propisanog vremena njihovog trajanja, ako je do oštećenja došlo iz opravdanih razloga, u vršenju ili povodom vršenja službe.

Član 21.

Sudski policajac kome prestane radni odnos po bilo kom osnovu, dužan je vratiti uniformu, sastavne i dopunske dijelove uniforme za koje je propisano vrijeme trajanja 18 mjeseci ili duže, u roku od sedam dana od dana prijema rješenja o prestanku radnog odnosa.

Član 22.

(1) Komandir sudske policije vodi evidenciju o izdatim uniformama, sastavnim i dopunskim dijelovima uniforme.

(2) Evidencija iz prethodnog stava sastoji se od kartona zaduženja i registra kartona zaduženja.

(3) Karton zaduženja formira se pojedinačno za svakog sudskog policajca prilikom izdavanja uniforme.

Član 23.

Komandir sudske policije dužan je organizovati nadzor o namjenskom korištenju, smještaju, zaduženju, čuvanju i urednom i tačnom vođenju evidencije o izdatim uniformama, sastavnim i dopunskim dijelovima uniforme.

DIO ČETVRTI - POSEBNE OZNAKE SUDSKE POLICIJE

Član 24.

Posebne oznake sudske policije nose se na uniformi i to:

- a) oznaka sudske policije BiH;
- b) pločica sa ličnim imenom sudskog policajca
- c) grb sudske policije BiH
- d) značka sudske policije BiH
- e) oznaka na beretki i kapi

Član 25.

(1) Oznaka sudske policije BiH nosi se našivena na gornjoj polovini lijevog rukava uniforme, kratke jakne, štitastog je oblika, tamno plave boje, visine 110 mm i širine 90 mm, čiji se gornji dio završava pod uglom od 120 stepeni. Oznaka je izrađena od visoko kvalitetne kamgarn tkanine oivičena sa unutrašnje strane izvezenom trakom zlatno žute boje, širine 5 mm. U gornjem dijelu izvezen je tekst "BOSNA I HERCEGOVINA", (latinicom) žute boje, a slova su visine 15 mm. Ispod ovoga teksta piše "BOSNA I HERCEGOVINA" (ćirilicom) žute boje, a slova su 15 mm. Na lijevoj strani izvezen je tekst "SUDSKA POLICIJA" žute boje, slova su visine 12 mm, a na desnoj strani "SUDSKA POLICIJA" (ćirilicom) žute boje, slova su visine 12 mm, a u donjem zaobljenom dijelu izvezen je tekst "SUDBENA POLICIJA" žute boje visine 12 mm. U sredini oznake, na zlatno žutim zracima raspoređenim u obliku desetokrake zvijezde izvezen je stilizovan grb Bosne i Hercegovine. Boje stilizovanog grba Bosne i Hercegovine identične su bojama grba Bosne i Hercegovine, visina grba je 40 mm i širina 30 mm.

(2) Izgled oznake sudske policije BiH odštampan je na obrascu broj 1. koji je sastavni dio ovog Pravilnika.

Član 26.

(1) Pločica sa ličnim imenom sudskog policajca nosi se iznad klapne desnog džepa gornjeg djela uniforme, izrađena je od mesinga, pravougaonog oblika, dužine 75 mm i širine 30 mm. U lijevom uglu se nalazi grb BiH dimenzija 15 x 10 mm. Slova ličnog imena su izgravirana štampanim slovima crne boje, dimenzija 7mm x 3 mm.

(2) Izgled pločice odštampan je na obrascu broj 2. koji je sastavni dio ovog Pravilnika.

Član 27.

(1) Grb Bosne i Hercegovine nosi se našiven na gornjoj polovini desnog rukava uniforme i kratke jakne. Veličina grba Bosne i Hercegovine odgovara veličini oznake sudske policije.

(2) Izgled grba BiH odštampan je na obrascu broj 3. koji je sastavni dio ovog Pravilnika.

Član 28.

(1) Značka sudske policije nosi se na lijevom džepu gornjeg dijela uniforme, a izrađena je od mesinga, dimenzija 70 mm x 70 mm, desetougaoanog oblika u kome su simetrično raspoređene crte u obliku zraka u čijem se središtu nalazi grb Bosne i Hercegovine. Sa lijeve strane grba polukružno piše "SUDSKA POLICIJA" (latinicom), sa desne strane grba polukružno piše "SUDSKA POLICIJA" (ćirilicom) a iznad grba, polukružno, piše "SUDBENA POLICIJA" (latinicom). Na samom dnu značke, u sredini, ispisan je broj značke koji odgovara broju službene legitimacije.

(2) Izgled značke sudske policije odštampan je na obrascu broj 4. koji je sastavni dio ovog Pravilnika.

Član 29.

(1) Oznaku na beretki i kapi čini grb Bosne i Hercegovine koji je izrađen od visoko kvalitetne tkanine, dimenzija 55 mm x 45 mm.

(2) Oznaka na beretki nosi se na desnoj strani prednjeg dijela beretke.

(3) Oznaka na kapi nosi se na prednjoj strani kape iznad šilta.

(4) Izgled oznake na beretki i kapi odštampan je na obrascu broj 5. koji je sastavni dio ovog Pravilnika.

Član 30.

Ovaj Pravilnik stupa na snagu danom donošenja, a objavit će se u "Službenom glasniku BiH"

Broj 01-02-5206/06
17. maja 2006. godine
Sarajevo

Ministar
Slobodan Kovač, s. r.

OBRAZAC broj 1

OBRAZAC broj 4

**ZNAČKA
SUDSKOG POLICAJCA BiH**

OBRAZAC broj 5

**OZNAKA ZA KAPU/BERETKU
SUDSKOG POLICAJCA BiH**

[Frame13](#) [Frame14](#) [Frame16](#)



